

LE CHAPITRE DE LA VILLE,
 contenant vingt versets, escrit
 à la Meque.

Plusieurs ont intitulé ce Chapitre, le Chapitre de
 la Nuit.

AV nom de Dieu clement & misericordieux. Je
 jure par cette Ville, qu'il t'est permis de la con-
 querir. Je jure par le pere & par l'enfant que nous
 auons créé l'homme dans la misere; Pense-t'il que
 personne ne soit plus fort que luy? Il dit qu'il a de-
 pensé de grands biens, pense-t'il que personne n'aye
 veu ce qu'il a fait? Ne luy auons nous pas donné deux
 yeux? vne langue? deux leures? ne luy auons nous pas
 fait voir le chemin du bien & du mal; il sera rigoureu-
 sement chastié, mais ie ne te diray pas de quelle sorte
 de chastiment. Pourquoy ne deliurera-t'il pas les
 esclaves? pourquoy ne donnera-t'il pas à manger à
 ceux qui ont faim? aux orphelins? à ses parens qui
 sont en necessité? & aux pauvres? La patience & la
 charité sont recommandées entre les vray croyans,
 ils seront assis à la main droite, & ceux qui impu-
 gnent les mysteres de nostre loy seront à la main gau-
 che, ils seront enfermez dedans le feu d'Enfer.

*C'est la
 Meque.*

*Il decla-
 me contre
 Coreis.
 Voy Ge-
 ladin.*